

# 1 San Juan

Causana Shimi nishcaga Jesus man

**1** <sup>1</sup>Jesucristo huiñaimandapacha causac ara. Pai Causana Shimi nishca agmandami quillcaunchi. Náucanchi quiquin rinrihuanmi paita uyaranchi, ñucanchi quiquin ñahuihuanmi ricuranchi, llangasha pai quiquin aichayuc actaga yachanchi. Chasna ricusha yachashami cunan cangunata rimanchi chi Causana Shimimanda. <sup>2</sup>Náupa jahuapacha Yayahuan tiyac ñucanchima shamura. Cai Jesucristotami ñucanchiga ricushcanchi. Cunanga cai ñucanchi ricushca huiñai Causana Shimimanda cangunata cuintanchi. <sup>3</sup>Náucanchiga Yaya Dioshuan paihua churi Jesucristohuanbas ña shugllami tucushcanchi. Chasnallata cangunahuas ñucanchihuan shuglla tucungahua nishami tucui ñucanchi ricushcata uyashcatahuas cangunama cuintanchi. <sup>4</sup>Caigunata cangunama quillcauchi tucui ñucanchi pacta cushi anghua.

Diosca punzhashinami  
jucha illac an

<sup>5</sup>Jesucristo cai ñucanchima yachachisha saquishca shimitaga cangunamas cuintauchi casna nishca: Diosca punzhashina man, paihuacpi ima ansahuas mana tiyanzhu pai jucha illac ashcamandami nisha Jesus

yachachira. <sup>6</sup>Náucanchi paihuan shuglla tucushca manchi nishallata ansaibicuinta causasha juchata raushaga llullauchimi, Diospa sirtu shimita mana pactachinchichu. <sup>7</sup>Randi Yaya Dios punzhaibi causaucshina ñucanchi alita punzhaibishina causashaga pariullami cushi causauchi. Chasnallata Jesucristohua rahuiga ñucanchi juchata tucuitami pichanga.

<sup>8</sup>Jucha illac manchi nishaga amullatami llullarinchi, Diospa sirtu shimita mana munasha cadsunchichu. <sup>9</sup>Randi ñucanchi juchata Yaya Diosta rimacpiga yachanchimi pai anchuchingami. Pi pactachic ashcamanda ñucanchi juchagunatas tucui ñucanchi jiridsa rashcagunatahuas anchuchishami tucuita cungaringami. <sup>10</sup>Ima uraspas mana juchata rashcanichu nishaga Diostami llullauchi, sirtupacha ñucanchi yuyaibi paihua shimita mana charinchichu.

Jesucristo ñucanchimanda  
Yayahuan cuintauc an

**2** <sup>1</sup>Caita quillcauni llaquishca huauquiguna canguna ima juchata rangahua. Randi maicanbas juchata racpiga jahuapachai tiyac Yayahuan ñucanchimanda shuc cuintacta charinchi, paiga jucha illac Jesucristomi. Paiga alita rac

man. <sup>2</sup>Jesucristomi ñucanchimanda huañusha jahuapacha Yaya ñucanchi juchagunata perdunasha anchuchingahua nisha huañura. Mana ñucanchiraicullachu huañura astahanubas tucui mundu runagunaraicumi perdunangahua huañura.

<sup>3</sup>Dios mandashcagunata ñucanchi pactachishaga sirtupacha paita ricsishcata yachanchimi. <sup>4</sup>Randi maicanbas ñuca Diosta ricsinimi nishallata mana pai mandashcagunata pactachishaga llulla runa man. Paihuacpi sirtu rimana yuyai mana tiyanzhu. <sup>5</sup>Astahanan maicanbas pai mandashcagunata pactachishaga sirtupacha Diosta llaquinmi. Chimandami ñucanchi paihan pariu causaushcata yachanchi. <sup>6</sup>Maicanbas Yaya Dioshuanmi causauni nishaga Jesucristo causashcashinami causana an.

#### Mushuc mandashca shimi

<sup>7</sup>Cai ñuca cangunata quillcasha mandashcaga mana mushucchu llaquishca huauquiguna, canguna pandamanda uyasha quirishcallata man cai mandashcaga. <sup>8</sup>Chasna agllaita cunán ñuca cai quillcaushcaga mushuc mandashca man. Ñáupamanda Jesucristo chi mandashcata sirtu rimara, chitaga cangunas ñáupamanda uyashcanguichi. Pai chi mandashcata cusha canguna shungu ucui ansacuinta mana aligunata anchuchisha tucuita punzhatashina alita rashcamí.

<sup>9</sup>Maicanbas Diospa punzhaibicuinta alita causauni nishallata pai quiric huauquita piñashaga chara ansaibishinami causaun. <sup>10</sup>Randi quiric huauquiguna llaquinacushaga Diospa punzhaishinami causanaun.

Chasna causacpi imahuas paita juchaibi urmachinata mana ushangachu. <sup>11</sup>Maicanbas quiriccunata piñacca ansaibicuuntami purisha causaun. Mana yachanzhu maita pai riushcatahuas jucha ansa puyuñahuitashina paita rashcamanda.

#### Caran shuc tunu quiriccunata quillcauni

<sup>12</sup>Jesucristo huañushcamanda Yaya Dios canguna juchata anchuchishcami nisha cangunama quillcauni llaquishca huahuaguna.  
<sup>13</sup>Callarimanda ac Yaya Diosta canguna ricsishcamandami cangunama quillcauni yayaguna. Supaita canguna binsishcamandami cangunama quillcauni maltaguna. Jahuapachai tiyac Yayata canguna ricsishcamandami cangunama quillcauni llaquishca huahuaguna.

<sup>14</sup>Callarimanda ac Yaya Diosta canguna ricsishcamandami cangunama quillcauni yayaguna. Canguna sinzhi quiric ashcamandas, Diospa shimita alita pactachisha causashcamandas, supaita binsishcamandahuas cangunama quillcauni maltaguna.

#### Cai munduta mana llaquinachan

<sup>15</sup>Jucha mundu yuyaítaga ima llaquinguichichu, chasnallata mundui mana ali runaguna rashcagunatas. Maicanbas mundui mana ali rashcagunata llaquishaga jahuapacha Yayata mana llaquinzhu. <sup>16</sup>Tucui munduibi tiyac jucha rashcagunaga mana jahuapacha Yayamanda llucshirinzhu, randi

mundu munaimandallatami llucshirin. Casna manaun: Aicha munashcata jiridsagunata rana, ñahui ricushcata charinatas munasha causana, chasnallata cai munduibi imasna ashahuas imatas charishahuas balirisha tucushcamanda alabarina. Tucui caigunami cai jucha munduibiga tiyanau. <sup>17</sup>Cai munduga tucurishami riun, tucui paibi tiyac jirus munaigunamanda, randi maicanbas Yaya Dios munashcata rac runaga huiñaitami causanga.

### Sirtu shimi, llulla shimi

<sup>18</sup>Yuyarichi llaquishca huauquiguna, puchucuai punzhaguna pactarimunmi. Cristota piñac shamungaraucta ña yachanguichi. Cunan uras ashca Jesucristohuan cuntar, umasha pandachic runaguna llucshirishcauna, chiraicu puchucuai punzhaguna pactarimunmi nisha yuyarichi. <sup>19</sup>Cai umasha pandachic runagunaga ñucanchimandallatami llucshirinaura randi mana ñucanchimandachanura. Sirtupacha ñucanchimanda ashca ashaga ñucanchihuanmi saquirinaunmara. Randi chasna llucshisha paglla pambaibi ricuchinaura mana shucpas sirtupacha ñucanchimanda ashcata.

### Jesucristo cushca Diospa Samaimanda

<sup>20</sup>Astahuanbas cangunataga Diospa Samaita Jesucristoga cui tucushcanguichimi, chasna acpi sirtu shimita yachachishcataga tucuimi yachanguichi. <sup>21</sup>Chasna acpimi quillcauni sirtu shimita canguna yachashcamanda. Canguna mana yachashca acpiga mana quillcaimacharani. Yachanguichimi ima llullahuas sirtu shimidangada mana shamunzhu.

<sup>22</sup>Pitan chi llullacca. Jesus mana quishpic Cristochan nisha rimac runaga llulla man, paimi Jesucristohuangua cuntar an. Paillatami jahuapacha Yayatahuas paihua Churitahuas mana munan. <sup>23</sup>Ñáa tucui Churita mana munacca pai mana ñuca amuchan nisha, jahuapacha Yayatahuas mana charinzhu. Randi tucui Jesucristota quiriccunaga paimi ñuca amu an nisha, jahuapacha Yayatahuas charinaunmi.

<sup>24</sup>Chiraicu canguna ima cungaringuichichu canguna ñaupamanda uyashca shimita. Cai Jesucristo rimashca shimi canguna shungu ucui aupiga cangunahuas Jesucristohuan jahuapacha Yayahanbas shugllami tucunguichi. <sup>25</sup>Chasnallata Jesucristomi huiñai causaita cushcanguichimi ni tucushcanchi.

<sup>26</sup>Cai tucuita cangunama quillcauni umachisha pandachic runagunamanda yachachingahua nisha. <sup>27</sup>Randi cangunaga Jesucristo cushca Diospa Samaita charishcaraicumi mana pihuas cangunata yachachinata minishtinguichichu. Diospa Samaillatami cangunataga tucuita yachachiun. Pai yachachishcaga sirtu man, mana llullachan. Chiraicu Jesucristohuan pariu causachi paihua Samai yachachishcashina.

<sup>28</sup>Cunanga llaquishca huauquiguna, Jesucristohuan pariu causachi pai shamushcaibiga ima manzharingahua, chasnallata paihua ñaupacpi ima pingaringahua. <sup>29</sup>Ñáa cunanga yachanguichimi Jesucristoga alita rac man. Chasnallata yachana manguichi tucui paishina alita rac runagunaga Diospa churi manaun.

### Diospa huahuagunamanda

**3** <sup>1</sup>Ricuichi huauquiguna, Yaya Diosca ñucanchita ashcata

llaquishcami. Pai llaquishcamandami Diospa huahuaguna nishca tucuranchi. Chasnami anchi. Chiraicumi jucha munduibi causac runagunaga Yaya Diosta mana ricsishcamanda ñucanchitahuas mana ricsitucunchi. <sup>2</sup>Cunanga Diospa huahuaguna manchi llaquishca huauquiguna. Náucanchi huasha imasna tucunatas mana yachanchichu. Randi Jesucristo cai pachama ricurimungaraushcaibiga pai imasna acta ña paglla pambai ricushcamandami ñucanchihuas paishinallata tucungaraunchi. <sup>3</sup>Jesucristo jucha illac sumac man. Chasna acpimi paita ricunata cushiyasha chapauc runagunahuas paishinalla jucha illac causangahuaca cuirarinch. <sup>4</sup>Juchata ranaga Dios mandashcata mana uyanachan. Chasna acpiga tucui juchata rac runagunaga Dios mandashcagunata mana pactachinzhu. <sup>5</sup>Cunanga ña yachanguichimi Jesucristo cai munduma shamushcata juchagunatas anchuchingahua, chasnallata pai ima juchahuas illac acta yachanguichi. <sup>6</sup>Chasna acpiga tucui Jesucristohuan pariu causacca mana juchata raunzhu. Randi maicanbas juchata rasha causac runaga Jesucristota mana ricsicchan.

<sup>7</sup>Pihuas cangunata ama umachitucunauchun llaquishca huauquiguna. Maican Jesucristota caticca paishina achun nisha alita rasha causac runaga Diospacpi ali runa man. <sup>8</sup>Supaiga pundamandapacha juchata rac ara. Chasnamandami juchata rasha causac runaga supaibac an. Chiraicumi Diospa Churi cai pachama shamura supaita binsisha pai rashcagunata chingachingahuami.

<sup>9</sup>Maicanbas Yaya Diospa huahua ac runaga mana juchata rashachu puriun

Dios cushca causaita charishcamanda. Yaya Diospa huahua ashcaraicu juchata rausha catinata mana ushanzhu. <sup>10</sup>Náa maican Diospa huahua acta, supaiba runa actas yachanalla man. Maicanbas mana alita rac runaga, chasnallata quiric huauquigunatas mana llaquicca mana Diospa huahuachan.

### Pariumanda llaquinacushunchi

<sup>11</sup>Cai rimashca shimiga canguna pundamandapacha uyashca shimi man pariumanda llaquinacuna manchi nisha. <sup>12</sup>Ama Cain nishca runashina aichichu, paiga supaibac tucushami pahua huauqui Abelta huanchira. Imangahuata huanchira. Pai rashcagunaga mana alichanaura, randi Abel rashcagunaga ali ashcamandami Cainga pai huauquita huanchira.

<sup>13</sup>Llaquishca huauquiguna ima manzharinguichichu jucha munduta catisha mana quiric runaguna cangunata piñacpihuas. <sup>14</sup>Caitaga yachanchi, Jesusta quirisha paita quiriccunata llaquishcamandami ñucanchi chi huañuima apana ñambita saquishcanchi, ña Dioshuan causaima apana ñambita puriuchi. Maicanbas quiric huauquigunata mana llaquishaga chara huañui ñambibimi puriuc an. <sup>15</sup>Maican quiric huauquigunata piñasha mana ricunayasha puric runaga shuc runata huanchicciunta tucun. Canguna ña yachanguichimi runata huanchicca mana Diospa huiñai causaita charinzhu.

<sup>16</sup>Jesucristo ñucanchimanda huauushcaraicumi sirtu llaquishcata yachanchi. Pai huañunagama llaquishca tupullatatami ñucanchihuas shuc quiric huauquita llaquina anchi. <sup>17</sup>Maicanbas huibagunatas charic cullquiyuc runa ashaga, shuc

yanapanata minishtiu huauquita ricushallata mana yanapashaga, Dios llaquinataga paihua causaibi mana charinzhu.

<sup>18</sup>Llaquishca huauquiguna, ñucanchi llaquinaga ama shimillahuan achun, astahuuanbas imatas rasha shungumanda sirtu llaquic ashcata rana achun.

**Yaya Diospa ñaupacpi  
cushi angahua**

<sup>19</sup>Ñaucanchi chasna llaquisha causashaga Diospa sirtu shimita quiriccuna aucta yachanchi. Chasna ashami tucui shunguhuan pailuanmi cushiyasha causanchi. <sup>20</sup>Ñá ima uras ñucanchi shungu mana quiricchangui nicpiga Dios ñucanchi shungumanda yuyaimandahuas mas yali yachac ashami tucui ñucanchi raushcagunata yachammi.

<sup>21</sup>Llaquishca huauquiguna ima juchata perdonda tapusha alichicpi ñucanchi yuyai ñucanchita mana caudsayachin. Ñá ñucanchi yuyai mana caudsayucchangui nicpiga Yaya Diospa ñaupacpi ima manzharisha causanchichu.

<sup>22</sup>Ñaucanchi Dios mandashcagunata pactachishcamanda, pai munashcata rashcamandahuas tucui ñucanchi paita mañasha tapushcata cuitucushunchimi. <sup>23</sup>Dios mandashcaga cai man: Paihua churi Jesucristota quirina, chasnallata quiricpura pariumanda llaquinacuna pai ñucanchita mandashcashina.

<sup>24</sup>Dios mandashcata pactachiccunaga pailuanmi causaunguna, chasnallata paihuas paigunahanmi causaun. Yaya Dios paihua Samaita cushcamandami yachanchi pai ñucanchihuan causaushcata.

**Asirtanamanda**

**4** <sup>1</sup>Llaquishca huauquiguna, cai munduibiga ashca llullasha pandachic runagunami tiyanaua Diospa partimandami rimac anchi nisha. Chasna acpi ama tucui chasna rimac runagunataga quirichichu. Ñáaupata ricuichi chi chasna rimac runagunahuacpi Diospa yuyai tiyanzhu u supaiba yuyai tiyactas yachangahua nisha. <sup>2</sup>Maicanbas Diospa Samai charishcata casna asirtanata ushanguichi: Tucui runaguna Jesucristoga cai pachama quiquin runa tucushami shamura nisha rimac runagunaga Diospa Samaitaga charinaun. <sup>3</sup>Randi Jesucristomanda mana casna aichayuc shamushcachu nisha rimac runagaca Diospa Samaita mana charinzhu, randi Jesusta cuntarba yuyaitami charin. Canguna ña uyashcanguichi Cristota piñacpa yuyai cai munduma shamungaraushcata, ña cunan cai munduibimi aun.

<sup>4</sup>Chasnamandami huauquiguna cangunaga Diospa churiguna manguichi. Cangunahuacpi auc Diospa Samaiga yali ushayuc ashcamandami chi llullasha pandachic runagunahuacpi auc supaiba yuyaitas binsishcanguichi.

<sup>5</sup>Supaiba runagunaga cai mundu causaimandallata anaun, chiraicumi cai mundui tiyaccunamandalla rimanaun. Rimaupi cai mundu causaita rauc runagunaga paigonata uyanaun. <sup>6</sup>Randi ñucanchi Jesucristota quirishami Diospa huahuaguna anchi. Chiraicumi Diosta pactachic runaga ñucanchi yachachishcata uyanaun. Randi supaiba runagunaga ñucanchita mana uyanata munanaunzhu. Casnami riesinata ushanchi maicanbas Diospa Samai sirtu yuyachishcata

rimacta, chasnallata maicanbas supai pandachina yuyaita rimactahuas.

**Diosta llaquic asha shuc quiriccunatas llaquishunchi**

<sup>7</sup>Llaquishca huauquiguna, sirtu llaquinaga Diospagmanda shamushcaraicu pariumanda llaquinacuna manchi. Tucui llaquic runagunaga Diospa huahuaguna manaun, paitaga ricsinaunmi. <sup>8</sup>Diosca sirtu llaquic man. Chasna ashcamandami chi mana llaquic runagunaga paita mana ricsinaunzhu.

<sup>9</sup>Yaya Dios paihua shuglla churita cai munduma ñucanchimanda huañuchun nisha cachasha pai quiquin llaquishcata ñucanchima ricuchira ñucanchi paimanda huiñai causaita charinauchun nisha. <sup>10</sup>Sirtu llaquinaga casna ricurin: Ñáucanchi chara mana Diosta llaquiullaitachu pai ñucanchita llaquisha paillatami ñucanchi juchagunata anchuchingahua huañuchun nisha paitua churitaga chagara. Chasnamandami pai ñucanchita sirtu llaquishcataga yachanchi.

<sup>11</sup>Llaquishca huauquiguna, casna Dios ñucanchita llaquishcamandami ñucanchihuas pariumanda llaquinacuna anchi. <sup>12</sup>Jahuapacha Yayataga pihuas mana ricushcachu. Randi ñucanchi pariumanda llaquinacusha causaupiga Diosllatami ñucanchibiga causaun, pai llaquishcaga ñucanchibihuas pactata tucun. <sup>13</sup>Dios paitua Samaita ñucanchima cushcamandami ñucanchi paituan causaushcataga, chasnallata pai ñucanchihuan causaushcatahuas yachanchi.

**Dioshuan causac runa pihuactan**

<sup>14</sup>Ñáucanchillatami Jesucristotaga ricuc aranchi, chiriacumi Yaya Diosca

paihua churita cachara munduta quishpichingahua nishami rimaunchi.

<sup>15</sup>Maican runahuas Jesucristoga Diospa churi man nisha quiricca Diospacpi causaun, chasnallata Dios chi runa ucuibis causaun. <sup>16</sup>Casca yachashami quirishcanchi Dios ñucanchita llaquishcataga.

Diosca llaquic man. Chasna acpimi maican llaquisha causac runaga Dioshuanmi causaun, chasnallata Diosca chi llaquic runa ucuibi causaun. <sup>17</sup>Cai munduibí Jesucristo causashcashina ñucanchi causashcamandami paitua llaquinaga ñucanchihuacpi pactariun. Chasna acpimi taripana punzhaibiga mana manzharishachu cushihuan shayaringaraunchi. <sup>18</sup>Yaya Dios llaquina aushcaibiga manzharina mana tiyanzhu, astahuanbas llaquinaga sirtupacha tucui manzhai yuyaita anchuchinmi. Taripashca tucunamandami manzhana llucshin. Chasna acpi maicanbas manzhashaga sirtupacha Diospa llaquinata mana charinzhu.

<sup>19</sup>Yaya Dios ñucanchita punda llaquiupimi ñucanchihuas paitaga llaquinchi.

<sup>20</sup>Randi maicanbas Diosta llaquinimi nishallata, shuc quiric huauquigunata piñasha mana ricunayashaga llulla runa an. Paitua quiquin ñahuihuan ricushca huauquillatata mana llaquishaga mana ricushca Diostas llaquinata mana ushanzhu. <sup>21</sup>Maicanbas Diosta llaquic runaga quiric huauquigunatahuas llaquisha causana manguichi nishami Diosca ñucanchita mandashca.

**Jucha munduta ñucanchi binsishcamanda**

**5** <sup>1</sup>Jesusmi Dios cachashca quishpichic Cristo acta quiric

runagunaga tucuillami Yaya  
Diospa huahuaguna tucushca anchi.  
Chasnallata maican runa Yaya Diosta  
llaquicca ña paihua huahuagunatahuas  
llaquinmi.<sup>2</sup> Náucanchi Yaya Diosta  
llaquishaga pai mandashcagunatas  
pactachishaga paihua  
huahuagunatahuas llaquiushcatas  
yachanchi.

<sup>3</sup> Yaya Diosta llaquinaga pai  
mandashcagunata pactachina  
man. Ñáa pai mandashcagunaga  
pactachinata ushanalla an.

<sup>4</sup> Chiraicum tucui Diospa  
huahuagunaga mundui ac juchata  
binsinau. Náucanchi Jesucristota  
quirishcamandami juchata binsinata  
ushanchi.

<sup>5</sup> Pita jucha yuyaita binsic an.  
Jesusca Diospa churi man nisha  
shungumanda quiric runaga ima  
juchatas binsinata ushanmi.

#### Diospa churi partimanda rimashca

<sup>6</sup> Jesucristo cai munduma  
shamushaga yacuhuanmi bautisarira,  
rahuaita talishami huañura. Pai  
yacuhuan bautisarishcamanda, rahuai  
talirishcamandas Diospa Samaillatami  
rimashca. Diospa Samaiga  
sirtuta rimac man.<sup>7-8</sup> Jesucristo  
shamushcataga quimsa (3) ricusha  
rimaccuna tiyanau: Diospa Samai,  
yacuhuas, rahuibas, cai quimsaguna  
Jesusmanda pariumi rimanaun.

<sup>9</sup> Runaguna sirtu ricushcata  
rimacpiga quirinchimi, randi Yaya  
Dios rimashcaga astahuanbas mas  
balic man. Yaya Diosllatami paihua  
churi Jesucristo shamanamandaga  
rimara.<sup>10</sup> Tucui runa Diospa churita  
quiricca Dios rimashcata paihua  
shungu ucuibimi charin, astahuan  
Dios rimashcata mana quiricca  
Diosta llullactashina ran, paihua

churimanda Dios rimashcata mana  
quirishcamandami.<sup>11</sup> Chimandami  
Yaya Dios casna rimashcata nin: Tucui  
Jesucristota quiriccunama Yaya Dios  
huiñai causaita cushcami. Chi huiñai  
causanaga paihua churihuagllaimi  
tiyaun.

<sup>12</sup> Maican runahuas Diospa churi  
Jesucristota quiricca huiñai causaitami  
charin, randi Diospa churita mana  
quiricca huiñai causaita mana  
charinzhu.

#### Puchucai yachachishcaguna

<sup>13</sup> Jesucristota quiriccunama caita  
quillcauni canguna huiñai causaita  
sirtu charishcataga yachangahua nisha.

<sup>14</sup> Jesucristota quirishcamandami  
ñucanchi imatahuas Dios  
munashcatashina mañasha tapucpiga  
pai uyangallami nisha yachanchi.<sup>15</sup> Pai  
uyac acta yachashami chasnallata  
yachanchi ñucanchi tapushcagunata  
pai ña cuitucushcanchi.

<sup>16</sup> Maicanbas shuc quiric huauqui  
mana huañunama apauc juchata  
raucta ricushaga paimanda Diosta  
mañaichi. Mañasha tapucpi Yaya  
Dios chi huauquita janbingami. Ñáa  
huañunama apauc juchagunahuas  
tiyan, chi tunu juchagunamandaga  
Diosta mana mañanachanguichi nini.

<sup>17</sup> Sirtu tucui mana alita rashcagunaga  
jucha man. Chasna agllaita mana  
tucuiguna huañunama apauc  
juchagunata ranaunzhu.

<sup>18</sup> Yachanchimi Diospa  
huahuagunaga ashami mana  
juchata rasha causauchichu.  
Diospa churi Jesucristo ñucanchita  
cuiraushcamandami supai mana  
imatas ranata ushangachu.

<sup>19</sup> Náucanchi Diospa huahuaguna  
ashcata yachanchimi. Randi cai tucui  
mundu intirumi supaiba maquibi aun.

<sup>20</sup>Chasnallata yachanchi Diospa  
churi Jesucristo shamushcata. Paimi  
ñucanchima yuyaita cura sirtupacha  
Dios acta yachanauchun nisha.  
Cunanga quiquin Dioshuan paihua  
churi Jesucristohuanbas pariumi

causauchi. Paimi sirtupacha Dios  
asha paillami huiñai causaita cuc an.

<sup>21</sup>Llaquishca huahuaguna, imatas  
camba shungu ucui diosshina ima  
tuccucunamanda anchurichi.

Chasna achun. Chillata rimani, Juan.